



বিয়াম ফাউন্ডেশন গবেষণা এবং পরামর্শ সেবা পরিচালনা নীতিমালা, ২০২৩
(BIAM Foundation Research and Consultancy
Service Policy, 2023)

বাংলাদেশ ইনস্টিটিউট অব গ্র্যাডমিনিস্ট্রেশন এন্ড ম্যানেজমেন্ট (বিয়াম) ফাউন্ডেশন
৬৩, নিউ ইস্কাটন, ঢাকা -১২১৭।

মুখবন্ধ


জনপ্রশাসন মন্ত্রণালয়ের অধীনে বাংলাদেশ ইনস্টিটিউট অব এ্যাডমিনিষ্ট্রেশন এন্ড ম্যানেজমেন্ট (বিয়াম) ফাউন্ডেশন বাংলাদেশ সিভিল সার্ভিস (প্রশাসন) ক্যাডারের সদস্যদের পেশাভিত্তিক উৎকর্ষ সাধন এবং উন্নয়ন ও ব্যবস্থাপনায় নিয়োজিত সরকারের সর্বস্তরের কর্মকর্তাদের পেশাগত মানোন্নয়ন ও দক্ষতা বৃদ্ধির উদ্দেশ্যে যথাযথ প্রশিক্ষণের ব্যবস্থা গ্রহণ এবং গবেষণা কার্যক্রম পরিচালনার লক্ষ্যে প্রতিষ্ঠিত। এ ফাউন্ডেশন বিভিন্ন সরকারি, আধা-সরকারি ও স্বায়ত্তশাসিত প্রতিষ্ঠানের চাহিদার পাশাপাশি নিজস্ব উদ্যোগে প্রশিক্ষণ প্রদান এবং গবেষণা কার্যক্রম পরিচালনাসহ বিভিন্ন সেমিনার, সিম্পোজিয়াম, কর্মশালা, শিক্ষা ও গবেষণাধর্মী অনুষ্ঠানে প্রয়োজনীয় সহযোগিতা করে থাকে। জ্ঞানভিত্তিক জাতি গঠন ও মানসম্পন্ন শিক্ষা ব্যবস্থা নিশ্চিতকরণের লক্ষ্যে বিয়াম ফাউন্ডেশন দেশের বিভিন্ন জেলা ও উপজেলায় বাংলা ও ইংরেজি মাধ্যমে ৪৪টি শিক্ষাপ্রতিষ্ঠান পরিচালনা করছে।


জনপ্রশাসন মন্ত্রণালয় কর্তৃক জারিকৃত ‘বাংলাদেশ ইনস্টিটিউট অব এ্যাডমিনিষ্ট্রেশন এন্ড ম্যানেজমেন্ট ফাউন্ডেশন রেজুলেশন-২০০২’-এর অনুচ্ছেদ ৫(গ) এবং ৫(ঠ) অনুযায়ী উন্নয়ন প্রশাসন ও ব্যবস্থাপনা বিষয়ে গবেষণা কার্যক্রম পরিচালনা এবং সরকার ও বিভিন্ন প্রতিষ্ঠানকে পরামর্শ ও সেবা প্রদান সুনির্দিষ্টভাবে বিয়াম ফাউন্ডেশনের কার্যপরিধির অন্তর্ভুক্ত। এছাড়া, পাবলিক প্রকিউরমেন্ট বিধিমালা (পিপিআর), ২০০৮ এর বিধি ১০৪(ঈ) অনুযায়ী বিয়াম ফাউন্ডেশন একক উৎসভিত্তিক পরামর্শক নির্বাচনের ক্ষেত্রে বিশেষায়িত সেবা প্রদানকারী যোগ্যতাসম্পন্ন প্রতিষ্ঠানের তালিকাভুক্ত।

দেশের অর্থনৈতিক ও সামাজিক উন্নয়নের সাথে সাথে গবেষণার প্রয়োজনীয়তা ক্রমেই বৃদ্ধি পাচ্ছে এবং গবেষণার ক্ষেত্রও বিস্তৃত হচ্ছে। জাতীয় উন্নয়ন লক্ষ্যমাত্রা অর্জনে প্রতি অর্ধবছর উন্নয়ন খাতে সরকারের বাজেট বরাদ্দ এবং আর্থ-সামাজিক উন্নয়নে গৃহীত প্রকল্পের সংখ্যা বৃদ্ধি পাওয়ার প্রেক্ষিতে বিভিন্ন প্রকল্পে পরামর্শ সেবা গ্রহণ ও সম্ভাব্যতা সমীক্ষা পরিচালনার চাহিদাও ক্রমবর্ধমান। প্রশাসন ও ব্যবস্থাপনার পাশাপাশি অর্থনৈতিক ও সামাজিক ক্ষেত্রসমূহে বিভিন্ন বিষয়ে গবেষণা ও উদ্ভাবনী কর্মকান্ড পরিচালনা এবং ক্রমবর্ধমান চাহিদার বিপরীতে বিভিন্ন প্রকল্পে উপযুক্ত পরামর্শ সেবা প্রদান ও সম্ভাব্যতা সমীক্ষা পরিচালনায় বিয়াম ফাউন্ডেশন মানসম্মত অবদান রাখতে পারবে মর্মে আশা করা যাচ্ছে। এ সকল কার্যক্রম ফাউন্ডেশনের অধীনে প্রতিষ্ঠিত ‘গবেষণা ও পরামর্শ সেবা সেল’-এর মাধ্যমে পরিচালিত হবে।

বিয়াম ফাউন্ডেশনের বুদ্ধিবৃত্তিক সর্বোচ্চ সম্ভাব্য মান সংরক্ষণে গবেষণার নৈতিক ভিত্তি ও জবাবদিহিতা, গবেষণা প্রকল্পের আর্থিক ব্যবস্থাপনা, সংশ্লিষ্ট তহবিলের সর্বোচ্চ সদ্যবহার এবং পরামর্শক সেবা প্রদানের ক্ষেত্রে সর্বোচ্চ মান নিশ্চিত করার লক্ষ্যে ‘বিয়াম ফাউন্ডেশন গবেষণা এবং পরামর্শ সেবা পরিচালনা নীতিমালা, ২০২৩’ প্রণয়ন করা হয়েছে। এ নীতিমালায় বিয়াম ফাউন্ডেশনের নিজস্বসহ অন্যান্য প্রতিষ্ঠানের চাহিদার ভিত্তিতে গবেষণা পরিচালনা এবং পরামর্শ সেবা প্রদানের ক্ষেত্রে প্রয়োজন অনুযায়ী মেধাসম্পন্ন, দক্ষ, অভিজ্ঞ, পেশাদার ও যোগ্যতাসম্পন্ন ব্যক্তিবর্গকে নিয়োজিত করার সুযোগ সৃষ্টি করা হয়েছে। নীতিমালাটি ফাউন্ডেশনের অংশীজন, তহবিলদাতা এবং গবেষণা ও পরামর্শক সেবা কার্যক্রম পরিচালনায় নিযুক্ত সকল ব্যক্তির জন্য প্রযোজ্য হবে।

‘বিয়াম ফাউন্ডেশন গবেষণা এবং পরামর্শ সেবা পরিচালনা নীতিমালা, ২০২৩’ প্রতিষ্ঠানের গবেষণা ও পরামর্শ কার্যক্রম পরিচালনায় একটি নতুন যুগের সূচনা করবে এবং স্থানীয় ও আন্তর্জাতিকভাবে বিয়াম ফাউন্ডেশনের ভাবমূর্তি উন্নত করবে মর্মে আমরা দৃঢ়ভাবে বিশ্বাস করি।


মোঃ মাহবুব-উল-আলম
মহাপরিচালক
বিয়াম ফাউন্ডেশন, ঢাকা।


৭/৭/২০২৩

